



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXV No. 4
Pebrero 21, 2004
www.philippinerevolution.org


Editorial

Madamu pa nga liko kag tiyog ang pagaagyan sang sugilanon pangkalinungan

Malisyoso, mapaniplang, maluibon. Ini ang mabug-at nga tinaga nga ginbuhian ni Luis Jalandoni, tsirman sang *peace panel* sang National Democratic Front of the Philippines (NDFP) sa tuyo sang rehimen nga bastuson ang kasugtanan sa Oslo, Norway nga napirmahan pa gid lang sang *peace negotiating panel* sang NDFP kag gubyrno sadtong Pebrero 14.

Ang kasugtanan, nga ginabilang nga ika-11 malahalon nga kasugtanan nga ginpirmahan sang duha ka *panel* halin sang ginsugdan ang sugilanon pangkalinungan sa tunga sang NDFP kag GRP sadtong 1986, ginlagdaan matapos ang apat ka adlaw nga negosasyon. Ini ang una sa serye sang mga pormal nga sugilanon pagkatapos ini suspendihon sang rehimen Arroyo sadtong 2001.

Ginasaad sa kasugtanan ang desisyon ang magtimbang nga bahin nga isulong ang proseso pangkalinungan kag atubangon ang mga ugat sang armadong banggianay. Sa partikular, gin-isahan sang duha ka bahin nga resolbahan ang sugilanon nahanungod sa pagbansag nga "terorista" sa PKP, BHB kag kay Jose Ma. Sison, puno nga konsultant sang NDFP *peace panel*. Himuon ini santo sa mga probisyon sang The Hague Joint Declaration, sang Joint Agreement on Safety and Immunity Guarantees (JASIG), sang Comprehensive Agreement on Respect for Human Rights and International Humanitarian Law (CARHRIHL) kag iban pa nga baylateral nga kasugtanan sa nagligad. Bag-o mag-abante ang sugilanon, may daku nga kontrobersya kag mabaskog nga gitgitan sa nasambit nga pagkalista nga



naglawig sang halos duha ka adlaw. Ginapamilit sang NDFP *panel* sa GRP *panel* nga ang aktibo nga pagpangampanya sang rehimen Arroyo kaangot sini baliskad sa ispiritu kag sa pungsodnon nga soberanya sang pungsod kag baliskad sang tanan nga daan ginpirmahan nga kasugtanan sa tunga sang NDFP kag GRP.

Sa ginpirmahan sining gintingub nga pahayag sadtong katung-anan lamang sang Enero, nagpasugot ang GRP nga maghimo sang mga ligal, pangpulitika kag diplomatiko nga inisyatiba para makuha sa listahan sang

Mga tampok sa isyu nga ini...

Mga aktibista, ginpatay sg militar

PAHINA 4

27 armas, naagaw sg BHB sa mga taktikal nga opensiba

PAHINA 5

Mumbai Resistance 2004

PAHINA 11


mga terorista ang PKP, BHB kag si Kaupod Jose Ma. Sison.

Ugaling sang talakayon na ang punto nga ini, tuso nga naghugas-kamot ang panel sang GRP kag ginsiling wala ini sang hurisdiksyon sa US kag iban pa nga pungsod nga nagamentenar sang amo nga listahan. Nagpakuno-kuno nga inosente ang GRP sa ginhimo sining pangampanya sa US kag Europe para ilakip sa listahan sang mga "dumuluong nga terorista" ang PKP, BHB kag si Kaupod Jose Ma. Sison sa katuyuan nga ipiton ang rebolusyonaryong kahublagan sa Pilipinas, hatagan dalan ang direktang pagpasilabot sang US batuk sa rebolusyonaryong kahublagan diri kag piliton ang PKP kag BHB nga magbiya sang armas kag magsurender sa GRP. Mas malaut pa, ginmanduan sang Malakanyang ang *peace panel* sang GRP nga ilihis ang pagsugilanon bahin diri kag ginsaylo ini sa pagpauntat sa polisyang sang rebolusyonaryong kahublagan nahanungod sa Permit to Campaign (PTC), pagpauntat sang mga taktikal nga opensiba sang BHB kag pagpasurender sa mga pwera kag armas sang hangaway sang banwa.

Sa tuyo sini nga makabentaha,

malusutan ang responsibilidad sini nga bawion ang pagbansag kag makambyo ang responsibilidad sa PKP, ginapamilit man sang GRP ang kahalam-utan nga kundisyon nga kinahanglan maghatag sang "ligal kag moral nga basehan" ang Partido, BHB kag si Kaupod Sison kon ngaa indi dapat bilangon nga terorista ang mga ini. Indi na kinahanglan pa nga pamatud-an sang Partido kag hangaway sang banwa nga kabaliskaran ang pagkalista nga ini sa mga prinsipyo sang rebolusyon kag makapumuluyo nga kinaiya kag sa perspektiba kag sa praktika sang PKP kag BHB.

Sa pihak sang tanan nga pagtinguha sang GRP nga torsehon ang mga hitabo kag paludhon ang NDFP, nangibabaw ang prinsipyado nga panindugan sang NDFP. Nagpasugot man ang GRP nga maghimo na sang pila ka diplomatiko nga tikang, kalakip ang paghingyo sini sa gubyrno sang Norway nga kumbinsihon ang mga alyado sini nga kuhaon sa "listahan sang mga terorista" ang PKP, BHB kag si Kaupod Sison. Sa amo pa man, bag-o gid lamang nakabalik sang *panel* sang GRP sa Maynila gilayon nga ginpahayag ni Teresita Quintos-



Deles, Presidential Adviser on the Peace Process, nga indi tumanon sang GRP ang nasambit nga obligasyon.

Mabaskog nga ginpakamalaut ni Jalandoni ang GRP sa padayon sini nga paghatag-rason sa mga paglapas sang US sa pungsodnon nga soberanya sang Pilipinas sa paagi sang pag-agaw sang hurisdiksyon sa mga rebolusyonaryong entidad kag nagakalatabo sa Pilipinas kag pagpasilabot kag pagbastos sa mga halambalanon kag kasugtanang sa tunga sang GRP kag mga rebolusyonaryong pwera.

Sa sulod sang GRP, pangunahon sa mga nagapasilabot kag nagasablag sa proseso pangkalinunangan ang mga militarista nga papet sang US sa Malakanyang kag AFP pareho nanday Defense Secretary Eduardo Ermita kag mga kontra-rebolusyonaryong tipo sang mga sosyal-demokrata pareho ni Deles. Samtang ginapamilit ni Deles nga kinamatarung sang US ang paglista, ginahambal naman ni Ermita kag ni Lt. Col. Daniel Lucero, tagapamaba sang Armed Forces of the Philippines, nga ang pagkakas sang PKP-BHB sa listahan makasablag sa kampanya sang AFP para dulaon ang mga operasyon kag impluwensya sang PKP-BHB sa kaumhan.

Kon magaguwa nga wala pulos kag pagabastuson lamang sang GRP ang mga kasugtanang sa Oslo kag iban



Tuig XXXV No. 4 Pebrero 21, 2004

Ang Ang Bayan ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa Philippine Revolution Web Central nga makit-an sa:

www.philippinerevolution.org

Nagabaton ang Ang Bayan sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial	1
Mga tiglawas sa JMC, ginnombrar	3
Mga aktibista, ginpatay sg militar	4
Kalakasan sa eleksyon	4
Mga taktikal nga opensiba	5
Pagpadamu sg mga manunudlo	6
Ka Basil	8
Mapait ang kalamay sa Negros	10
Mumbai Resistance 2004	11
Balita	12

Ang Ang Bayan ginabantala duha ka beses kada bulan sang Komite Sentral sang Partido Komunista sang Pilipinas

pa nga kasugtanan, ilabi na ang probisyon hananugod sa pagkakas sa PKP-BHB kag kay Kaupod Sison sa listahan sang mga "terorista," madulaan sang basehan para padayunon pa ang negosasyon pangkalinun-
ngan.

Kapares sang natabo sa bag-o natapos sini nga serye, lauman naton ang madamu pa nga pagliko kag marikot sa proseso sang sugilanon pangkalinungan kag hugot nga pakigbanggi sa reaksyon sa patag nga ini sang paghimakas, kadungan sang padayon nga pagpasulong sang madugayan nga inaway banwa tubtub sa maangkon na naton ang lubos nga kadalag-an.

Padayon nga hugot naton nga kaptan ang armadong paghimakas bilang pangunahon kag pinakamasaligan nga pamaagi sang rebolusyonaryong paghimakas kag ang hayag nga pangmasang paghimakas kag parlamentaryong paghimakas bilang malahalon man nga sekundaryo nga pamaagi sang paghimakas. Kadungan, nagapursiger kag nagapabilin kita nga bukas sa pagpakignegosasyon pangkalinun-
ngan bilang dugang nga patag sang paghimakas, tubtub bukas man kag may desisyon ang sa pihak nga bahin nga makigsugilanon kag magkasugot. Kon wala sang amo nga desisyon ang rehimeng Arroyo, handa ang PKP nga hulaton na lamang ang magabulos diri nga rehimen nga mahimo may mas daku nga interes nga isulong ang proseso pangkalinungan. **AB**

Mga benepisyo sang pumuluyo halin sa kasugtanan sa Oslo

Sa pihak sang mga liko sa bag-o lang matapos nga halintang sang proseso pangkalinungan, may yara nga mga taktikal nga kadalag-an nga naagum ang PKP, NDFP kag rebolusyonaryong kahublagan sa serye nga ini nga mahimo panginpuslan sang pumuluyo, maluwas na lang kon baraghal nga lapason ini sang GRP.

Sa minimum, panginpuslan sang pumuluyo ang kasugtanan sa Oslo sa paagi sang ginalauman nga pagpahilway sang masobra 300 bilanggong pulitikal, indemnipikasyon sang 10,000 biktima sang layi militar (base sa listahan nga daan ginsumiter sang NDFP) kag pagtukod sang Joint Monitoring Committee para magserbi nga alagyan sang mga reklamo sang minilyon nga pumuluyo nga biktima sang militarisasyon, mga abuso nga militar kag iban pa nga paglapas sa ila tawhanon nga kinatarung.



Tukuron na ang Reciprocal Working Committee on Social and Economic Reforms nga amo ang magahanda sang burador para sa ikaduha na topiko sa substantibo nga adyenda sang sugilanon pangkalinun-
ngan.

Liwat man ginpalig-on ang The Hague Joint Declaration sang 1992 bilang balayon sa sugilanon tigaylo sang ginhagna nga Final Peace Agreement nga unilateral nga ginbalay sang Malakanyang para magserbi nga kasugtanan sang pagsurender. Kag pinakadaku ang papel kag nangin mas aktibo ang gubyerno sang Norway bilang ikatlo nga partido sa sugilanon, bagay nga nagserbi nga pagkilala sa *belligerency status* sang NDFP. Mahimo makakuha pa ang pumuluyo kag rebolusyonaryong kahublagan sang dugang nga kadalag-an base sa dalagan sang mga masunod pa nga serye sang sugilanon. **AB**

Mga tiglawas sa JMC, ginnombrar

Kumpleto na ang mga tiglawas sang NDFP kag GRP para sa tukuron nga Joint Monitoring Committee (JMC). Ang pagtukod sang JMC nakasandig sa nakasaad sa Comprehensive Agreement on Respect of Human Rights and International Humanitarian Law (CARHRIHL). Ang komite nga ini ang nakatalana nga magbantay sa implementasyon sang kasugtanan kag magbaton sang mga reklamo kaangot sang mga ini.

Ginnombrar sang NDFP sanday

Kaupod Fidel Agcaoili, Coni Ledesma kag Danilo Borjal bilang mga tiglawas sang NDFP samtang ginpili sang GRP sanday Rene Sarmiento, Jose Luis Martin Gascon kag Risa Hontiveros-Baraquel agud magtiglawas sa GRP.

Ginnombrar man sang NDFP sanday Obispo Maximo Tomas Millamena sang Iglesia Filipina Independiente kag si Marie Hilao-Enriquez sang KARAPATAN kag SELDA (Samahan ng mga Ex-Detainees Laban sa Detensyon at

para sa Amnestiya) bilang mga taga-obsarbar. Sa bahin sang GRP, gintumod sanday Mercy Contreras kag Aileen Bacalzo.

Ginalauman nga pormal nga matukod ang JMC sa una nga pagmiting nga nakatalana hiwaton sa sulod sang 90 adlaw. Sa amo pa man, makita pa sa proseso kon ano kaepektibo kag tubtub diin ini mapatuman ilabi na wala sang anuman nga paghanda diri ang reaksyunaryong gubyerno kag wala interes ang AFP nga ipatuman ini. **AB**

Mga aktibista para sa tawhanon nga kinamatarung, ginapamatay sa Mindoro

Labi nga nangin wala hawid kag mapintas ang pasistang militar sa paghimo sini sang kontra-rebolusyonaryo nga gera. Sining Pebrero, brutal nga ginpatay ang tatlo ka aktibista nga nagasakdag sa tawhanon nga kinamatarung kag nagabato sa militarisasyon sa Mindoro.

Sadtong Pebrero 13, ginpatay si Juvy Magsino, Vice Mayor sang Naujan, Oriental Mindoro kag tagapamuno sang Provincial Justice and Peace Council kag ang kaupod niya nga si Leima Fortu, Secretary-General sang Karapatan-Oriental Mindoro. Matapos abangan kag paulanan sang bala ang ila salakyan sa Pinasabangan-2, Naujan, malapitan nga ginluthang sang ginapatihan mga tinawo sang 204th Brigade sang Philippine Army. Natabo ang pagpamatay tunga sa kilometro lamang halin sa kampo sang 204th Brigade.

Sining Pebrero 18, ginkuot sang pito nga ginadudahan militar si Adrian Alegria sang Sta. Cruz, Mindoro Occidental, isa ka aktibista nga nagakampanya batuk sa militarisasyon sa Mindoro, ila balay sa Barangay Lumang Bayan, Sta. Cruz bandang 2:30 sa kaaganhon. Pagbutlak sang adlaw, nakit-an nga nagalutaw ang iya bangkay sa Amnay River sa banwa sang Sablayan. Makit-an sa iya lawas ang naagyan niya nga toryur bag-o siya patyon. Nag-angkon siya sang isa ka igo sang bala sa dughan kag isa pa sa tangkugo nga naglapos sa iya guya. Pito ka beses siya nga ginbuno.

Sanday Magsino, Fortu kag Alegria amo ang labing ulihi lamang sa pahaba nga pahaba nga listahan sang mga biktima sang kalakasan militar indi lang sa Mindoro kundi sa bug-os nga pungsod.

Mabaskog nga ginakundenar sang Partido Komunista kag bilog nga rebolusyonaryong kahublagan ang pagpatay kanday Magsino, Fortu kag Alegria. Liwat ginapatampok sini ang nagadamo nga kaso sang mga

pagpatay sa mga aktibista nga nagasakdag sa tawhanon nga kinamatarung. Sadtong nagligad nga tuig, ginkidnap kag ginpatay sang mga ginapatihan man nga tinawo sang 204th Brigade sanday Eden Marcellana, Pangkabilugan nga Sekretaryo sang Karapatan-Southern Tagalog kag Eddie Gumanoy, Tagapamuno sang Kasama-TK sa banwa man sang Naujan. Ginapakita sang mga hitabo nga ini ang labi nga nangin mapintas kag wala pili ang kalakasan militar sa desperasyon nga lupigon ang padayon nga nagasulong nga rebolusyonaryo nga armadong kahublagan. Akig katama ang Armed Forces of the Philippines sa mga aktibista nga nagabuyagyag sa mga pagpang-abuso militar kag paglapas sa tawhanon nga kinamatarung sang pumuluyo kag nagasakdag sang mga progresibo kag maka-pumuluyo nga interes.

Mismo si Arroyo ang nagabuyok sa wala untat nga pagpanghalit sang militar sa Mindoro. Sa pihak sang madamu nga reklamo batuk sa militar, ginpasidunggan ni Arroyo si Col. Jovito Palparan, ang berdugo sang Mindoro kag anay kumander sang 204th Brigade. Halin 2001, ang 204th Brigade ang responsable sa nagapalaba nga listahan sang pagsalbeyds, pagtortur, mga iligal nga pag-aresto, pwersahan nga pagpabakwit, harasment, pagpang-abuso sa mga kinamatarung sang mga bata kag mga pang-abuso batuk sa kababainhan.

Tinguhaon sang Partido kag sang BHB nga hatagan sang hustisya ang mga pagpatay nga ini paagi sa pagsilut sa mga taghimo kag paglunsar sang mga taktikal nga opensiba batuk sa militar. AB



Juvy Magsino

Kalakasan batuk sa mga progresibong kandidato kag partido

Sa nagkalain-lain nga bahin sang pungsod, lubos nga ginapunggan sang mga pasista ang pagdalagan sang mga progresibong kandidato kag partido sa eleksyon.

Liwat ini nga ginapamatud-an sang wala untat pili nga pagpatay kanday Magsino, Fortu kag Alegria, lunsay mga kilala indi lamang bilang mga tagasakdag sang tawhanon nga

kinamatarung kundi bantog man nga mga katapu sang mga progresibo nga partido nga nagabato subong sa reaksyunaryong pulitika.

Sanday Magsino kag Fortu ang ika-36 kag ika-37 nga myembro sang Bayan Muna nga ginpatay sang mga pasistang pwersa umpisa nga nag-entra ini sa reaksyunaryong eleksyon sadtong 2001.

Bilang pangkabilugan nga sekretaryo sang Karapatan kag coordinator sang Bayan Muna-Calapan City, gin-atubang ni Fortu ang madamu nga pamahug sa iya kabuhi.

Si Magsino naman nagapadalagan bilang meyor sang Naujan. Nakulbaan katama ang mga pasista nga makapungko si Magsino bilang

sundan sa "Hugnat..," pahina 5



27 armas, naagaw sang BHB

Indi magnubo sa 27 armas ang naagaw sang BHB halin sa kaaway sa sulod sang nagtaliwan nga simana.

Masbate, Pebrero 16. Ginambusan sang mga Pulang hangaway sa idalum sang Romulo Jallores Command ang mga tropa sang 506th PNP Provincial Mobile Group sa Barangay bagtas, Milagros, Masbate. Bandang 2:30 sang hapon sang ang gintingub nga tropa sang PNP kag Scout Rangers inigo sang *command-detonated land mine* (eksplosibo nga gintanom sa duta kag kinahanglan hungod palukpon). Siyam ang patay, lakip si Sr. Insp. Santiago Tacordo Jr. kag tatlo ang malubha nga napilasan sa bahin sang 12-katawong PNP.

Ilocos Sur, Pebrero 16. Ginsalakay sang BHB ang isa ka Special Operations Team (SOT) sang 50th IB nga nakakwartel sa Barangay Hall sang Quibit-Quibit, Sinit. Napatay ang timlider sini nga sarhento samtang pilason ang tatlto ka korporal.

Negros Occidental, Pebrero 15. Ginlusob sang mga katapu sang Boy Gatmaitan Command sang BHB-Negros ang detatsment sang CAFGU sa Barangay Mahalang, Himamaylan City. Nakumpiska sang mga gerilya sang BHB ang tatlo ka M14 at tatlo Garand antes sila mag-atras. Duha ka Pulang hangaway, sanday ka

Ricky Agrava kag Ronnie Chavez ang namatay sa inaway nga ini. Walo ang pilason sa bahin sang AFP.

Compostela Valley, Pebrero 14. Ginsalakay sang walo-katawong yunit sang BHB ang "Linda" Detachment sang 1102nd Police Provincial Mobile Group sa Barangay Fatima, Nabunturan. Napatay ang isa ka pulis sa unang nga hugnat sang linupok. Isa pa ka elemento sang CAFGU ang namatay samtang ginadala sa ospital. Napilasan ang isa pa ka pulis kag isa ka babaye nga sa sulod sang detatsment sadto. Naghalad sang kabuhi ang isa ka gerilya sang BHB sa taktikal nga opensiba nga ini.

Nakaagaw ang mga Pulang hangaway sang tatlo ka M16, duha ka M14 kag isa ka .45 pistola.

Quezon, Pebrero 9. Gin-ambus sang BHB ang *deputy chief* sang Mauban PNP sadtong Pebrero 9 sa sentro mismo sang banwa. Suno sa pahayag sang Apolonio Mendoza Command, si SPO3 Paulino Mancenido protektor sang iligal nga droga, iligal nga pangisda, iligal nga logging kag ekstorsyon.

Kalinga, Pebrero 6. Sumurender pagkatapos masorpresa ang mga elemento sang CAFGU sa idalum sang 77th IB sang salakayon sang isa ka platun sang BHB ang ila kampo sa Barangay Limos, Pinukpuk sadtong Pebrero 6. Sa una nga

hugnat sang mga linupok, kumayampad sang dalagan ang nakibot nga mga elemento sang Philippine Army kag CAFGU samtang napilasan ang duha ka paramilitar. Nakakumpiska sang 13 ka ripleng M14 nga may 1, 319 bala, 1 Garand nga may 81 bala kag isa ka Motorola VHF radyo. Antes mag-atras, ginsunog sang BHB ang kampo sang kaaway.

Cagayan, Pebrero 1. Lima ka suldado sang 17th IB kag isa ka elemento sang CAFGU ang gilayon nga namatay sa una nga hugnat sang linupok sang ambusan sila sang Danilo Ben Command sang BHB sa nakatundang Cagayan. Naklining man nila ang isa ka M16 sa pag-ambus nga ini nga ginlunsar sa Barangay Illuru Sur, Rizal.

Nagapatrulya ang mga tropa sa mga baryo sang Rizal, Piat, Sto. Nino kag Lasam sang ambusan sila sang BHB.

Oriental Mindoro, Enero 25. Isa ka platun sang BHB ang madinalag-on nga nakig-engkwentro sa mga tropa sang 19th Special Forces Company sa Sityo Gumatos, Barangay hagan, Bongabong. Nagsulod sa *ambush site* ang mga suldado sang lagson sang mga ini ang isa ka kaupod nga nagserbi nga paon. Napatay ang tatlo ka elemento sang SFC samtang pila pa ang pilason.

AB

"Hugnat..." halin sa pahina 4

meyor ilabi na nga madali niya mapadaug ang eleksyon bangud sa iya panindugan para sa progresibo kag makabanwa nga interes sang pumuluyo. Pamatuod sang kabaskog sang iya kandidatura ang pagsuporta sa iya bisan mga pulitiko nga kabahin sang Lakas-CMD.

Si Alegria naman lider sang mga pamatan-on nga mangunguma kag coordinator sang Anakpawis sa Sta. Cruz, Mindoro. Pareho sang Bayan Muna, nga utod nga partido sini, ang Anakpawis ginainitan man sang militar. Hugot nga ginabantayan kag ginaharas ang mga

organisador kag myembro sini.

Sadtong Pebrero 2, arbitrario nga gin-aresto, gin-interogar kag ginditiner sang mga elemento sang 61st IB ang tatlo ka organisador sang Bayan Muna kag Anak Bayan sa Barangay Molobolo, Cauayan sa Negros. Sanday Isabel Necesario nga katapu sang Anak Bayan, Julia Tabat nga katapu sang Bayan Muna kag si Medardo Sayosa, isa man ka katapu sang Bayan Muna, gintamnan sang mga bala kag dokumento, kag gilayon nga gin-akusar nga mga myembro sang BHB.

AB




Pagpadamu sang mga instruktur sang rebolusyon sa Camarines Sur

Para makahabig sa rebolusyon sang pila ka pulo ka milyon nga mangunguma sa malapad nga malapyudal nga kaumhan, indi maayuan ang importansya nga makapatuhaw ang Bag-ong Hangaway sang Banwa (BHB) kag mga rebolusyonaryong organisasyong masa sang mga instruktur. Sadtong nagtaliwan nga tuig, gintinguhaan sang isa ka platun sa isa sa mga prenteng gerilya sang Camarines Sur nga pabaskugon ang makinarya pang-edukasyon sa erya sini. Kag labing maayo ang nangin resulta sini.

Sang magtasa ang platun sadtong Hunyo, ginpamangkot ni Ka Nell, ang upisyal pangpulitika kag siya ang may responsibilidad nga manguna sa hilikuton pang-edukasyon, kon "ano pa ang pwede naton himuon?" Ang sakup sang yunit nagabug-os sang pila ka pulo ka libo nga pumuluyo sa mga barangay sa mga mabulubukid nga lugar, sa kapatagan kag baybayon. Mabungahon ang pagpalapad kag konsolidasyon, nga nakapatuhaw sang masobra isa ka gatos ka grupong pang-organisa, komiteng pang-organisa kag lubos nga asosasyong masa. Pero bangud hitad na katama ang siyam ka instruktur halin sa platun kag pila ka dosena nga instruktur halin sa mga lokal nga organisasyong masa, madamu ang wala natigayon nga target sa paghatag sang mga basehang kurso pangmasa.

"Malahalon katama," pagtum-ok ni Ka Nell, "sang mga kurso pangmasa para painiton ang inisyatiba kag mas aktibo nga pagpasakup sa rebolusyonaryong hilikuton kag mga paghimakas." Gindugang ni Ka Mel, platun lider kag ginauban na nga beterano halin pa sadtong dekada 1980, nga "Isa sa mga leksyon nga nakuha sa daan nga pagsayup amo ang pagkamalahalon nga sangkap sang pangpulitika nga kamuklatan sang aton mga organisasyong masa para sila matuod nga magpaminsar kag maghulag



bilang rebolusyonaryo. Malahalon ang aton hilikuton pang-edukasyon." Ginpaambit man ni Ka Mark, isa ka madugay na nga lider sang Partido kag kilala bilang mapasensyuso kag mapisan nga instruktur, nga ang ila sanga sang Partido sa lokalidad pwede tani makalunsar sang mas madamu pa nga pagtuon kon may yara lang sila sang mas madamu nga teksto.

Sa amo sadto gintumod ang subong nga makinarya pang-edukasyon sang teritoryo, gintasa ang mga kahinaan sini kag nagbalay sang plano para pabakuron ang malahalon nga Pambansang-Demokratikong Paaralan sa erya.

Gilayon pagkatapos sang pagtasa naghiwat sang Paghanas para sa mga Instruktur sang Kurso Pangmasa (PIKP) para sa mga instruktur halin sa kubay sang mga lubos panahon nga Pulang

hangaway kag mga lokal nga organisasyong masa. Ang mga nag-organisa sang paghanas gindagsa sang mga hingyo para magtambong bangud sang una ini nga gin-anunsyo, ginsiling nga bukas ini lunsay sa mga bag-uhan nga instruktur kag sa mga gusto mangin instruktur. Pareho sang madamu nga iban pa nga aktibidad, indi sarang mahatagan ang tanan kag kinahanglan rendahan ang kakunyag sang mga kaupod kag masa bangud sa mga konsiderasyon sa seguridad kag lohistika.

Madinalag-on nga nahiwat ang duha ka simana nga paghanas nga gintambungan sang mga naghalin sa platun, kaingod nga mga yunit gerilya kag mga lokal nga organisasyon. Nagakadlaw nga ginasaysay ni Ka Sammy, isa sa mga instruktur, nga: "Nahuya pa ang mga kaupod sang una pero sang mag-abot na kami sa



praktikum sa hingapusan sang paghanas, halos kinahanglan nga rendahan ang tanan bangud indi na sila makontento sa paghatag lamang sang malip-ot nga bahin sang mga kurso bilang praktis!" Ginpalawig ang paghanas agud may dugang nga panahon para sa praktikum, bangud siling niya, "dapat lang nga dakpon kag palambuon ang amo nga sari sang kapagsik." Gindesisyunan man nga ang mga bag-uhan nga instruktur ang magahatag sang mga paghanas sa paagi nga *buddy system* kon sa diin ginatulunga sang duha ukon sa tatlo nila ang isa ka kurso. Hipos sila nga nagabantayan sang isa ka mas may eksperensya nga instruktur samtang sila nagatudlo kag gilayon nagahiwat sang pagsaway kag pagsaway-sa-kaugalingon pagkatapos para makita ang mga kalakasan kag kahinaan. Daan nga ginpadasig sang PIKP ang amo nga mga *on-the-job training* paagi sang pagpataas sa kumpyansa sang mga bag-uhan nga instruktur kag paghatag sa ila sang pauna nga tangkas sang mga *lesson plan*, bulig biswal kag mga pangkultura nga palaguwaon.

Malahalon nga sangkap sa pagpadasig sang paghanas ang pagsaylo halin sa mga armado nga yunit pangpropaganda pakadto sa platun bilang basehan nga pormasyon.

Sa subong, mas madali para sa mga mas abante nga kadre ang maghanas sang bag-o pa nga instruktur. Ang mga bag-uhan ginabuligan sang mga hanas nga mapangibabawan ang ila mga kulba. Nadumduman ni Ka Paulo, nga nakatapos lamang sang ikatlo nga grado ugaling nangahas magtudlo sang Malip-ot nga Kurso sa Katilingban kag Rebolusyong Pilipino (MKKRP), kon paano anay siya nagapalanig-a sa kulba sa tunga sang klase, nga daw gusto na


lang niya magtago sa likod sang teksto nga ginakaptan niya. Sa mga panahon nga ina, siling niya nga nagayuhom, "ang mga tangu-tango kag yuhom halin sa isa ka kaupod sa likod ang nakapabaskog sang akon buot."

Guwa sa mga aktwal nga sesyon, ginabuyok ang mga talakayan nahanungod sa basehan nga rebolusyonaryong teorya kag prinsipyo para mapatalum ang paghangup sang tanan nga ini. Ginako sang pangaduha nga platun lider kag kon kis-a masyado seryoso nga si Ka Charlie, nga "ang matuod, mahibal-an mo kon ano na kadalum ang paghangup sang mga kaupod sa rebolusyonaryong teorya kon ispontanyo na sila nga nagalahuganay halin diri." Nagayuhom man nga ginsambit niya ang isa pa ka bentaha-nangin mas mahipos ang mga kampo bangud mas ginapili na lang sang iban nga palalahog nga kaupod nga magbasa. "Huo gali, kinahanglan pa namon pabuyluhon sang husto ang amon programa sa literasi sa sulod sang yunit kag kabay nga matigayon ini sa malapit nga inadlaw," dugang niya.

Ginatinguhaan man sang platun nga magpatuhaw sang mas madamu pa nga teksto kag bulig biswal. Sa bulig sang mga alyado sa syudad, nakapabalhag sila sang may 50 libro kung sa diin gintipon ang mga basehang kurso. Ang katunga sini may sukat nga 8 ½" x 11", ginbalhag gamit ang daku nga letra kag ginahatag sa mga lokal nga instruktur; kag ang nabilin amo ang mga libro nga un-kwarto lamang sini ang kadakuon kag madali isulod sa mga bakpak sang mga Pulang hangaway. Ang mga biswal para sa mga kurso ginguhit sa kartolina kag mga daan nga kalendaryo gamit ang *pentel pen* kag ginpabakod paagi sang pagteyp sa kilid sini, ukon indi

gin-imprensa sa tela paagi sa silkscreen. Nakatipon man sang mga mapa, retrato kag pati isa ka inflatable globe (modelo sang kalibutan nga ginasudlan hangin nga daw lobo).

Pag-abot sa katapusan sang tuig, may nagakaigo na nga kumpyansa ang katunga sang platun nga magtudlo sang bisan pila ka basehan nga kurso pangmasa. Maluwas pa ini sa solido nga ubod sang platun nga may ikasarang magtudlo bisan sang mas abante nga kurso pangpartido. Indi na problema ang kakulangan sang mga instruktur bisan nakadispers pa ang platun sa mga iskwad para sa hilikuton pangmasa sa malapad nga erya. Dugang nga nagbaskog ang mga komite pang-edukasyon sang mga lokal nga rebolusyonaryong organisasyong masa, nga amo ang taludtod sang makinarya pang-



edukasyon sang teritoryo.

Talalupangdon man ang mas mataas nga lebel sang kumpyansa sang yunit sa hilikuton propaganda. Wala na gintapos ni Ka Ren ang ika-anum nga grado para mahatagan kahigayunan ang pinakaagot niya

Sundan sa "Pagpadamu....," pahina 8



Ka Basil, dungganon nga rebolusyonaryo


"Masiling nga ang kasaysayan ni Ka Basil sa rebolusyon kasaysayan man sang bilog nga Timog Katagalugan. Tanan nga tiyog, liko kag lukso sang rebolusyon sa rehiyon nga ini naupdan niya. Tanan nga mapait nga halintang sang paghulag, paghigugma kag pagpamilya naayan niya diri. Sa amo man, ang malipayon nga tinion kag matam-is nga kadalag-an sang pagpasulong sang rebolusyon nabatyagan niya diri." —Ka Higom Maragang

Sadtong Pebrero 6, namatay si Mabini Permalu Fabon, 52, kilala bilang Ka Basil, Ka Romy, Ka Andoy, Ka Benny, Ka Albert, Ka Bitoy kag sining ulihi, Ka Apolinario, samtang ginadul-ong sa Batangas agud ipabulong ang wala ginalauman nga malala nga balatian. Isa si Ka Basil sa mga rebolusyonaryo nga pinakamadugay nga nag-alagad sa Southern Tagalog. Salaming ang iya kabuhi sang kasaysayan sang rebolusyonaryong kahublagan sa rehiyon.

Katapu sang Kabataang Makabayan (KM) si Ka Basil sang ginpapanaog ang layi militar sadtong 1972. Lakip siya sa 15 aktibista nga nag-inisyatiba nga nagkadto sa kaumhan sang Cavite agud mag-organisa sa masa didto kag pangitaon ang Bag-ong Hangaway sang Banwa. Sadtong 1974, paagi sang pungsodnon nga pamunuan sang KM nga padayon niya ginaangutan, nagsumpa siya bilang kandidato nga katapu sang Partido. Nangabuhi siya sa mga

mabulubukid nga bahin sang Cavite kag madalum nga nag-ugat sa kubay sang mga mangunguma didto tubtub 1976. Gingamit niya ang mga dokumento sang Partido bilang ubay sa pag-organisa samtang nagahulat nga maangutan sang BHB. Nakasimpon siya sa BHB sa Quezon-Bicol Zone (QBZ) pag-abot sang Disyembre 1976.

Nadestino siya sa Tagkawayan, Quezon sadtong 1977 kag diri niya lubos nga nahibal-an ang pagpalapad kag pagpalig-on sang isa ka prenteng gerilya santo sa estrathehiya sang madugayan nga inaway banwa. Sa panahon nga ini nalab-ot sang paghulag sang BHB ang kalaparan sang QBZ kag ginlab-ot sini sa una nga kahigayunan ang mga banwa sang Ragay kag Lupi sa Camarines Sur. Daku man ang ginbulig ni Ka Basil sa pagpauswag sang hilikuton edukasyon kag ginpauswag niya ang paggamit sang mga bulig biswal para mas madali mahangpan sang mga



mangunguma. Sa panahon man nga ini nangin lubos nga katapu sang Partido si Ka Basil.

Sanglit nga gindestino sa hilikuton propaganda sadtong 1980 kon sa diin gindumalahan niya ang pagpagguwa sang Kalatas, ang rebolusyonaryong pahayagan sang rehiyon. Pero sa tuig man nga ini ginsaylo siya sa yunit pang-organisa sa lindero sang Batangas-Laguna-Quezon agud palaparon ang sakup sang BHB didto. Madinalag-on nga nabuksan sang BHB ang Lipa, Padre Garcia, Rosario, Taysan, San Juan kag Lobo sa sidlangang Batangas sa pihak sang mabaskog nga operasyon sang AFP. Pero nag-agi sang mabaskog nga hanot ang yunit nga ginapasakupan ni Ka

sundan sa "Ka Basil...", pahina 9

"Pagpadamu...", halin sa pahina 7

nga utod nga nagasugod pa lang magtuon. Pero siling niya, nga daw may pagdayaw man sa kaugalingon, "kon kis-a madugayon ako nga nagapatalakayan bahin sa mga pungsodnon nga isyu sa mga titser kag negosyante ukon bahin sa reporma sa duta sa mga mangunguma nga pwede ko na mangin lolo."

Sa una nga paglantaw, daw ang mga titser sang BHB kag rebolusyonaryong organisasyong masa ginalimitahan sang manubo nga lebel nga gin-abot sang pormal nga edukasyon. Bangud ang daku nga

mayorya sa mga kaupod naghalin sa imol nga masang mangunguma, madamu sa ila ang napilitan nga mag-untat sa pagtuon sa linghod nga edad agud magbulig sa uma ukon sa simple nga rason nga indi sarang gastuhan sang ila pamilya ang ila pagtuon. Pero malayo na ang nalab-ot sang lubos nga determinasyon nga bunga sang rebolusyonaryong ispiritu. Para sa madamu, kinahanglan lang nga pabaskugon ang kumpanya nga magtilaw man lang anay agud mahibal-an nga matuod gali na mahimo sila nga mangin maayo nga instruktur sang rebolusyon.

AB



"Ka Basil...", halin sa pahina 8

Basil. Sadtong 1982, nareyd kag nagguba ang yunit nga ini sa Lipa. Solo si Ka Basil kag isa pa ka hangaway ang nakasalbar. Sa amo pa man, wala mabuhinan ang pagpursiger kag kapagsikon ni Ka Basil.

Sa panahon nga ini ginserioso niya ang pag-asawa kag pagtukod sang pamilya sa balayon sang iya paghulag sa kaumhan. Ginkasal sila sang iya nobya sadtong Marso 29, 1985 sa isa ka kweba sa Bukid Banoy sa Batangas sa tunga sang mabaskog nga operasyon militar sang kaaway sa lugar.

Pag-abot sang 1985, nagpartisipar siya sa ikaduha nga kumperensya pangrehiyon kag napilian bilang regular nga katapu sang Komiteng Rehiyon (KR) sang Partido sa ST.

Sadtong 1988, nabiktima siya sang Operation Missing Link, ang binuang nga kampanya anti-impiltrasyon nga ginpatuman sa ST. Isa siya sa mga nasalbar sang ginrebyu kag ginpauntat ini sang pamunuan sang Partido. Sa bulig sang mga kaupod, ginsuma niya ang iya inagihan bilang biktima sang OPML kag nagtinguha nga pangibabawan ang mga pisikal kag sikolohikal nga epekto sini sa iya. Gilayon siya nagpaidalum sa balayon sang pag-areglo sang organisasyon, padayon nga nagmentenar sang angot sa mga kaupod kag nagtungod sang mga masarangan niya nga hilikuton rebolusyonaryo samtang nagarekober. Samtang nagapayo, ginbuhos niya ang iya masarangan para mabuligan sa problema pangpangabuhian kag makaukod ang asawa kag bugtong nga anak.

Padayon siya nga nagbasa sang

mga sinulatan nanday Marx, Engels, Lenin, Stalin kag Mao, ginpanindugan ang mga basehang prinsipyo kag panan-awan sang Marxismo-Leninismo-Maoismo kag ginkaptan ang rebolusyonaryong desisyon. Wala magdugay, liwat siya nagpul-taym.

Sang ginlunsar ang Ikaduha nga Dungganon nga Kahublagang Panadlong sadtong 1992, gilayon niya ginhakos ang mga leksyon kag gin-atubang ang mga hangkat sini. Gilayon siya nagsabat sa panawagan sang Partido nga liwat paligunon ang mga basehang prinsipyo, lakip ang desisyon nga hugot kaptan ang armadong paghimakas. Samtang nagapabilin ang desisyon nga liwat magbalik sa paghulag sa prenteng gerilya, padayon pa niya anay nga ginatungdan ang mga hilikuton sa syudad.

Sadtong 1998, liwat siya nagsimpon sa BHB. Gintugyan sa iya ang pagdumala sang isa ka prenteng gerilya nga distrito kadaku sa Quezon.

Sa iya liwat nga pagsimpon sa BHB kag pagtungod sang hilikuton sa pagpamuno sa prenteng gerilya, ginadayaw sang mga kaupod ang iya malig-on nga panindugan para sa rebolusyon sa pihak sang ginagyan nga pag-antos kag kabudlayan. Balewala sa iya ang mga pilas sang gera, ang kon kis-a maagyan nga gutom kag iban pa nga sakripisyo sa pagrebolusyon.

Madasig siya nga nakapangibabaw sa mga pagtilaw kag nagapabilin nga malig-on sa tunga sang pagpanghalit sang militarisasyon sa nasayluhan niya nga prenteng gerilya. Wala magdugay gindeploy siya sa Mindoro.

Ang masobra tatlo ka tuig niya

Ang tanan nga mga kaupod nga nakakilala sa iya saludo sa iya matingkad nga positibo nga kinaiya. Isa siya nga dungganon nga halimbawa sa mga kaupod nga nangin biktima sang OPML nga nagtinguha makapangibabaw diri, kag naghakos kag nagtib-ong sa IDKP.

sa Sidlangang Mindoro naghatag sa iya sang panibag-o nga kapagsik kag paglaum sa pagpasulong sang rebolusyon. Ginlab-as niya ang madamu nga inagihan niya sa paghulag sa Cavite, Quezon-Bicol Zone, Batangas kag Laguna. Ginkilala ang importansya sang manggaranon niya nga mga kaalaman kag inagihan.

Samtang lubos niya ginahatagan importansya ang mga leksyon sang IDKP labi niya nga nakita kag natun-an ang mga pino nga punto sini labi na ang mga pagtadlong sang mga nagtaliwan nga kahinaan sa hilikuton pangmasa kag iban pa nga hilikuton sang BHB. Wala siya ginluyahan kundi nahangkat sa labing pagtadlong kag labing magpakabatid sa panibag-o nga dispusisyon.

Ang tanan nga mga kaupod nga nakakilala sa iya saludo sa iya matingkad nga positibo nga kinaiya. Isa siya nga dungganon nga halimbawa sa mga kaupod nga nangin biktima sang OPML nga nagtinguha makapangibabaw diri, kag naghakos kag nagtib-ong sa IDKP. Malig-on siya sa kabudlayan kag sakripisyo, wala nahibal-an nga bisyo, disiplinado sa kaugalingon kag sa lawas, wala nagapangita sang mga kasulhayan, kon anano nga pagkaon ukon anuman nga luho.

AB

(Ginkuha sa "Mapulang Pagpupugay kay Kasamang Basil, dungganon nga martir sang rebolusyong Pilipino," pahayag ni Ka Higom Maragang, Tagapamaba sang Lucio de Guzman Command, Isla sg Mindoro, Pebrero 8, 2004.)



Mapait ang kalamay sa Negros

May nagabilog nga krisis sa sektor sang kalamay. Daku ang posibilidad nga liwat magaluntad ang tig-gulutom sa Negros pareho sa natabo sadtong una nga tunga sang dekada 1980 ilabi na nga nagasalig lamang sa produksyon sang kalamay ang ekonomya sang isla. Singkwenta'y saís porsyento (56%) sang kabilugan nga 2.2 milyon metriko tonelada (MT) nga produksyon sang kalamay sadtong Crop year (CY) 2002-2003 naghalin sa Negros.

Padayon nga pagtibusok sang presyo sang kalamay. Wala untat sa pagtibusok ang presyo sang kalamay sa pangkalibutanon kag lokal nga merkado. Halin sa P880 kada 50 kilo bag, nagtibusok sadtong Disyembre 2003 ang presyo sa *mill gate* padulong sa P660. Nagtibusok pa ini sa P638 sining ulihi nga simana sang Enero.

Responsable sa padayon nga pagtibusok sang presyo sang lokal nga kalamay ang lima ka pinakadaku nga taga-import kag negosyante sa kalamay. Lubos ang ila kontrol sa importasyon kag eksportasyon, paggaling, presyo, merkado, pinansya, suplay kag istakan sang kalamay sa pungsod kag hugot sila nga nagakunsabuhay sa mga ahensya sang gubyerno. Lakip diri ang Lucky Two Trading, La Perla, Vision Marketing, Victorias Marketing kag Makati Agro Marketing. Kahimbon sang mga ini ang mag-ulutod nga Jose Miguel (Mike) kag Ignacio (Iggy) Arroyo nga nagahatag pahanugot kag imbolbado sa madamuan nga ismagling sang kalamay. Nagapadipulos man si Eduardo "Danding" Cojuangco, tsirman sang San Miguel Corporation, sa madamuan nga pag-angkat sang kalamay kag sa pagtibusok sang presyo sang lokal nga asukal.

Mataas nga gastos sa

produksyon. Dehado sa kumpetensya ang mga lokal nga prodyuser sang kalamay sa atubang sang pagtibusok sang presyo sini bunga sang pagtinambak sang imported nga asukar. Ini bangud sa tuman kataas nga gastos sa produksyon. Sadtong CY 2003, nagtaas ang gastos sa produksyon sang P715 (abereyds) kada 50 kilo bag bangud nagtaas man ang presyo sang abono kag iban pa, pero masobra 600 lang ang presyo sang isa ka bag nga kalamay.

Dugang pa, nangin pagsulundan na ang "technical smuggling" ukon ang pagbaligya sa lokal nga merkado nga pangkonsumo sang barato nga imported nga kalamay (nga halin sa Thailand, Vietnam, China kat Australia) nga dapat tani para lamang sa gamit-industriyal. Sa pagsulod sang *premixed sugar concentrate* (ginagamit sa mga *fruit juice* sang mga kumpanya sang pagkaon kag mga *processor*), napahigad sa lokal nga balaligyaan ang ginatantya 120,000 tuhtub 150,000 metriko tonelada nga lokal nga kalamay.

Bangud sa tanan nga ini, nagbuhin ang kita, mga bisyo kag luho sang dalagku kag medyum nga saray sang mga *sugar planter* (nagtanum sang tubo). Madamo sa ila nga may utang sa bangko naremate na.

Pero ang labing apektado amo ang mga nagapanag-iya sang lima ektarya nga tubuhan panubo nga naga-isip sang mas o menos 14,000 *sugar planter*. Kulang ukon wala kapital ang mga ini para mapataas ang produksyon gani nagapilitan sila magbaligya na lamang sang ila kalamay sa labing manubo nga

presyo.

Labing nagaantos. Bunga sini, nagapasingki nga kaimulon ang ginaatubang sang 581,000 mamumugon sa mga sentral kag repinarya, mamumugon sa uma kag mangunguma, luwas pa sa lima ka milyon nga pumuluyo sa pungsod (3.2 milyon sa Negros) nga nagasalig sa sektor sang kalamay para sa ila pangabuhian.

Nagapabilin nga manubo ang ila suhol kong indi man kulang, kag halos wala sila sang nabaton nga benepisyo. Suno sa National Federation of Sugar Workers (NFSW), ang aktwal nga minimum nga sweldo kada adlaw sa mga asyenda amo halin P30 tuhtub P100. Sa papel lang ang ginasugid nga P140 tuhtub P169 nga minimum nga sweldo kada adlaw. Tuhtub buhi man sila sa pagka-kontraktwal nga mamumugon kag kaswal nga trabahador sa pagluntad sang imperyalistang globalisasyon. Dugang pa, bunga sang polisiyang flexible labor, ginpahalin ang madamu sa ila, nga napaupod sa nagadaku nga hangaway sang mga wala trabaho. Sadtong 2001, ginreport sang DOLE nga masobra 70% sang kabilugan nga 210,000 nga wala tarabaho sa Western Visayas makit-an sa Negros.

Maugat ang partikular nga krisis sa sektor sang kalamay sa garuk nga sistemang malapyudal kag malakolonyal kag sa lubos nga pag-ikog-ikog sang papet nga gubyerno pareho sang rehimeng Arroyo sa imperyalistang globalisasyon. Samtang indi lubos mabag-o ang garuk kag mapiguson nga nagaharing sistema nga ini, samtabg wala sang matuod nga reporma sa duta kag kaangot nga pungsodnon nga industriyalisasyon, magapadayon ang makaluluoy nga kahimtang sang sektor sang kalamay.

AB



Batuk sa imperyalistang globalisasyon kag gerang agresyon

Mumbai Resistance 2004, madinalag-on nga ginhiwat

Madinalag-on nga ginlunsar sadtong Enero 17-20 ang Mumbai Resistance 2004 Against Imperialist Globalization and War (MR 2004) sa India. Ang apat ka adlaw nga pagtilipon kabahin sang pagpursiger nga isulong ang isa ka mabaskog nga pangkalibutanon nga kahublagang anti-imperyalista.

Nagtambong diri ang masobra 1,000 tiglawas sang 310 organisasyon, partido kag kahublagan halin sa nagkalain-lain nga pungsod nga nagaisa sa kakinahanglanon nga sundon ang dalan sang militante nga pagbato sa imperyalista kag reaksiyon. Sa hingapusan nga adlaw sang pulong, naghiwat sang daku nga rali kag martsa pakadto sa embahada sang US sa Mumbai ang pila ka pulo ka libo nga myembro kag tagasuporta sang mga organisasyon kag kahublagan nga nakapasakup sa MR 2004. Ang mga ini nagahiliusa nga kinahanglan lubos nga batuan ang imperyalistang globalisasyon kag gerang agresyon.

Ang MR 2004 amo ang amot sa padayon nga pagtinguha nga bilugon ang kubay sang mga pumuluyo nga ginaulipon sang imperyalismo kag pabaskugon ang ila pagpamatuk kag pagbato. Sa sulod sang apat ka adlaw, dumaguob sa Mumbai ang mga tingog sang pagpamatuk sa pagpamuyong kag pagpanalakay sang imperyalistang US, sang iban pa nga imperyalistang gahum kag mga ahente sang mga ini batuk sa pumuluyo kag madamo pa nga pungsod sa kalibutan.

Kumprehensibo nga ginsakup sang MR 2004 ang mayor nga mga halambalanon nga may kaangtanan sa imperyalistang globalisasyon,

gera kag banggianay sang mga sahi kag nanari-saring paagi kag alagyan sang paghimakas padulong sa pangkontra sang pungsodnon kag pangkatilingban nga pagpahilway. Matapos ang duha ka adlaw nga gintigana sa talakayan, naghiliusa, nanumpa kag naglagda sa Mumbai Declaration ang mga nagtambong sa MR 2004. Ginhiwat ang MR 2004 kadungan sang paghiwat sang World Social Forum (WSF) nga ginhimo man didto sa Mumbai agud ibuyagyag ang ginadala-dala nga repormismo kag

pagpakigkumpromiso sa mga imperyalista sang mga nagapamuno sa WSF. (Sa balita nga ginbalhag sa nagtaliwan nga isyu sang AB, nagkulang nga tumuron ang matuod nga kinaiya nga ini sang WSF kag ang paghiwat sang MR 2004 bilang pangkontra diri.)

Madamu nga pwersa sang WSF ang matuod nga nagatuyo nga batuan ang imperyalismo. Ugaling indi nila maabot ang ila tinutuyo bangud masami nabahura ang WSF sa wala katapusan nga mga diskusyon kag debate. Ang ila inisyatiba ginapunggan sang kakulang sini sang pangsulod nga demokrasya.

Ginadominahan ang WSF sang mga Trotskyista, mga repormista nga sosyal-demokrata kag mga burukrata nga NGO. Nakigbuligay ang mga ini sa mga operatiba sang



mumbai resistance

CIA sang US kag ginapondohan sang Ford Foundation agud tabunan ang mga pundamental nga halambalanon sa imperyalistang pagpamuyong kag pagpanghimulos kag upangan ang dalan sang militante nga pagbato sang mga pumuluyo.

Ginasakdag kag ginapondohan sang mga imperyalista ang pagtukod sang WSF bilang reaksiyon sa mga nagakatabo nga militanteng anti-imperyalista nga kahublagang protesta batuk sa World Trade Organization sa Seattle sadtong 1999 kag pagtukod sang sang militante kag anti-imperyalista nga International League of Peoples' Struggle (ILPS) sadtong tuig man nga ina.

Sa paghayag sa matuod nga kinaiya sang WSF, ginabuyok sang MR 2004 ang mga pwersa nga nagapangita sang matuod kag signipikante nga pamaagi sang pagbato sa imperyalismo kag reaksiyon nga makighiliusa sa mga militante nga paghulag.

Gintumod sang MR 2004 ang imperyalismo bilang pinakaugat sang mga kaimulon kag kapigusan nga ginabatas sang pumuluyo kag mga atrasado nga pungsod sa kalibutan. Nagapanindugan ang MR 2004 nga nagakadapat lamang ang imperyalismo lubos nga pukanon sang pumuluyo sang kalibutan. **AB**

Welga sang mga drayber kag opereytor, ginlunsar

GINPARALISA sang mga welga sang mga drayber kag opereytor sang pangpubliko nga salakyan sa Metro Cebu sadtong Pebrero 10 kag sa prubinsya sang Bulacan sadtong Pebrero 16.

Ang welga sa mga syudad sang Cebu, Lapu-Lapu kag Mandaue ginpamunuan sang NADSU (Naghiusang Drayber sa Sugbo). Naparalisa ang 98% sang mga byahe sang adlaw nga ini. Ginpamunuan naman sang PISTON-Bulacan kag Bulacan Transportation Alliance (BATAS) ang welga pangtransportasyon sa Bulacan, nga halos lubos nagparalisa sang pampublikong transportasyon sa prubinsya. Bunga sini, napilitan magdeklara nga wala klase ang halos tanan nga buluthuan sa bilog nga probinsya,

halin primarya tubtub kolehiyo. Naglapad ang welga tubtub Pampanga kag Nueva Ecija.

Nagtaas ang presyo sang krudo halin P13.75 kada litro sadtong Oktubre 2000 pakadto sa P18.41 sining Pebrero, pero wala sang kasunod nga pagsaka sang pasahe. Kadungan sini, nahulog sa 36% ang kita kada adlaw sang isa ka ordinaryo nga drayber halin P186.25 sadtong 2000 pakadto sa P119.75 sang nagtaliwan nga tuig. Ginademanda sang mga drayber nga may P1.50 tubtub P2.00 nga dugang sa pasahe sang mga pangpubliko nga salakyan sa una nga lima ka kilometro kag pagkatapos sini, sang dugang nga 37 sentimos sa Metro Manila kag 18 sentimos sa mga prubinsya.

Paghipos sa kaso nga rape, ginpakamalaut

GINPAKAMALAUT sang Migrante International ang paghipos kon indi man pagkunsabuhay sang Manila Economic and Cultural Office (MECO) sa kaso sang pagpanglugos sang isa ka Pilipina domestic helper (DH) sa Taiwan. Nagpasaka sang kaso sang pagpanglugos si "Rose," isa ka DH, batuk sa amo niya nga si Elmer Fung, anay representante sang Taiwan. Sa tigaylo nga magbulig sa pag-imbestiga, hipos nga ginasuportahan sang MECO ang gilayon nga pagpauli kay Rose. Ginabanta man nga nahibal-an sang MECO ang pagpanuhol ni Fung agud pahipuson si Rose. Wala man lang magpaabot sang diplomatikong protesta ang Pilipinas, sa balidad nga wala relasyon diplomatiko ang duha ka pungsod.

Depisit sa negosyo, naghabok

NAGDAKU sang anum ka beses ang depisit sa negosyo sang pungsod kumparar sa nalista sadtong 2002. Nag-abot sa \$1. 697 bilyon ang depisit sa negosyo sa Pilipinas halin sa \$218 milyon sadtong 2002. Bunga ini pangunahon sang pagdamu sang gina-import nga mga elektronikong pyesa nga ginagamit para sa pagkumpunir sang mga semimanupaktura pang-eksport.

Mining Act, ginapauntat

Ginahangkat sang Cordillera People's Alliance (CPA) ang rehimeng Arroyo nga gilayon nga ipatuman ang desisyon sang Korte Suprema sadtong Enero 29 nga nagasaad nga indi konstitusyonal ang mayor nga mga prubisyon sang Mining Act of 1995. Ginapahanugutan sang Mining Act ang 100% nga pagpanag-iya sang mga dumuluong sa mga minahan. Kaangot sini, nagapanawagan ang CPA nga imbalido ang tanan nga mga kontrata nga ginsudlan na sang gubyrno sa mga dumuluong nga kumpanya sang pagpmina.

Kontra ang desisyon sang korte sa Executive Order 170 nga ginpasa sang rehimen agud wala hawid nga mapatuman ang Mining Act.

Pagpasara sa Bombo Radyo sa Isabela, mabaskog nga ginkundenar

Mabaskog nga ginkundenar sang National Democratic Front-Northeastern Luzon- (NDF-NEL) ang dinastiyang Dy sa pagpasara sini sa Bombo Radyo dzNC-Cauayan sadtong Pebrero 17. Suno kay Salvador del Pueblo, tagapamaba sang NDF-NEL, ini paglapak sa kahilwayan kag kinamatarung sang pumuluyo sa hilway nga pamamahayag.

Ginatus-gatos man nga pumuluyo sang Isabela sa pagpanguna sang Bagong Alyansang Makabayan (BAYAN-Isabela) ang nagmartsa padulong sa *city hall* sang Cauayan City sining Pebrero 20 agud ipakita ang ila mabaskog nga pagpamatuk sa pagpang-ipit sang pamilyang Dy. Suno sa BAYAN, magahimo sang serye sang mga rali ang iban pa nga grupong multisektoral agud buksan liwat ang istasyon sang radyo.

Wala kuno nakabayad sang buhis kag may mga ginlapas nga ordinansa ang Bombo Radyo gani wala ini ginhatagan sang pahanugot nga mag-opereyt sang alkalde sang Cauayan nga si Caesar Dy. Pangaduha nga beses na nga ginpasara sang alkalde ang dzNC bangud sa mabaskog nga pagpamakamalaut sini sa korapsyon, warlordismo kag awtoritarianismo sang dinastiyang Dy, nga madugay na nagakontrol sang reaksyunaryong pulitika sa Isabela.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon

Tuig XXXV No. 4

Pebrero 21, 2004


www.philippinerevolution.org*Editorial*

Madamu pa nga liko kag tiyog ang pagaagyan sang sugilanon pangkalinungan

Malisyoso, mapaniplang, maluibon. Ini ang mabug-at nga tinaga nga ginbuhian ni Luis Jalandoni, tsirman sang *peace panel* sang National Democratic Front of the Philippines (NDFP) sa tuyo sang rehimen nga bastuson ang kasugtanan sa Oslo, Norway nga napirmahan pa gid lamang sang *peace negotiating panel* sang NDFP kag gubyerno sadtong Pebrero 14.

Ang kasugtanan, nga ginabilang nga ika-11 malahalon nga kasugtanan nga ginpirmahan sang duha ka *panel* halin sang ginsugdan ang sugilanon pangkalinungan sa tunga sang NDFP kag GRP sadtong 1986, ginlagdaan matapos ang apat ka adlaw nga negosasyon. Ini ang una sa serye sang mga pormal nga sugilanon pagkatapos ini suspendihon sang rehimen Arroyo sadtong 2001.

Ginasaad sa kasugtanan ang desisyon ang magtimbang nga bahin nga isulong ang proseso pangkalinungan kag atubangon ang mga ugat sang armadong banggianay. Sa partikular, gin-isahan sang duha ka bahin nga resolbahan ang sugilanon nahanungod sa pagbansag nga "terorista" sa PKP, BHB kag kay Jose Ma. Sison, puno nga konsultant sang NDFP *peace panel*. Himuon ini santo sa mga probisyon sang The Hague Joint Declaration, sang Joint Agreement on Safety and Immunity Guarantees (JASIG), sang Comprehensive Agreement on Respect for Human Rights and International Humanitarian Law (CARHRIHL) kag iban pa nga baylateral nga kasugtanan sa nagligad. Bag-o mag-abante ang sugilanon, may daku nga kontrobersya kag mabaskog nga gitgitan sa nasambit nga pagkalista



nga naglawig sang halos duha ka adlaw. Ginapamilit sang NDFP *panel* sa GRP *panel* nga ang aktibo nga pagpangampanya sang rehimen Arroyo kaangot sini baliskad sa ispiritu kag sa pungsodnon nga soberanya sang pungsod kag baliskad sang tanan nga daan ginpirmahan nga kasugtanan sa tunga sang NDFP kag GRP.

Sa ginpirmahan sining gintingub nga pahayag sadtong katung-anan lamang sang Enero, nagpasugot ang GRP nga maghimo sang mga ligal, pangpulitika kag diplomatiko nga inisyatiba para makuha sa listahan sang

***Mga tampok sa
isyu nga ini...***

**Mga aktibista, gin-
patay sg militar**

PAHINA 4

**27 armas, naagaw sg
BHB sa mga taktikal
nga opensiba**

PAHINA 5

**Mumbai Resistance
2004**

PAHINA 11